

四庫全書

集部

# 欽定四庫全書

集部

御定全唐詩錄卷七十八

詳校官左中允<sub>臣</sub>瑋五珠

主事銜<sub>臣</sub>徐以坤覆勘

總校官原任中允<sub>臣</sub>王燕緒

校對官中書<sub>臣</sub>田尹衡

謄錄監生<sub>臣</sub>黃廷璧

謄錄監生<sub>臣</sub>俞鳳

欽定四庫全書

御定全唐詩錄卷七十七

李商隱

三

近體詩

二

錦瑟

錦瑟無端五十絃一絃一柱思華年  
莊生曉夢迷蝴蝶望帝春心託杜鵑  
滄海月明珠有淚藍田日暖玉生烟  
此情可待成追憶只是當時已惘然

按義山房中曲歸來已不見錦瑟長

于人此詩寓意畧同是以錦瑟起興非專賦錦瑟也細  
素雜記引東坡適怨清和之說竊不謂然恐是偽託耳  
劉貢父詩話云錦瑟當時貴人愛姬之名或  
遂實以令狐楚青衣說尤誣妄當亟正之

重過聖女祠

白石巖扉碧蘚滋上清淪謫得歸遲一春夢雨常飄瓦  
盡日靈風不滿旗萼綠華來無定所杜蘭香去未移時  
玉郎會此通仙籍憶向天階問紫芝

潭州

潭州官舍暮樓空今古無端入望中湘淚淺深滋竹色

楚歌重叠怨蘭叢  
陶公戰艦空灘雨  
賈傅承塵破廟風  
目斷故園人不至  
松醪一醉與誰同

南朝

玄武湖中玉漏催  
雞鳴埭口繡襦迴  
誰言瓊樹朝朝見  
不及金蓮步步來  
敵國軍營漂木柿  
前朝神廟鎖烟煤  
滿宮學士皆顏一作蓮色  
江令當年只費才

送崔珏往西川

年少因何有旅愁  
欲為東下更西遊  
一條雪浪吼巫峽

千里火雲燒益州卜肆至今多寂寞酒壚從古擅風流  
浣花牋紙桃花色好好題詩詠玉鉤

飲席戲贈同舍

洞中屐響省分攜不是花迷客自迷珠樹重行憐翡翠  
玉樓雙舞羨鷓鴣雞蘭迴舊蕊緣屏綠椒綴新香和壁泥  
唱盡陽關無限疊半杯松葉凍頗黎

寄令狐學士

秘殿崔巍拂彩霓曹司今在殿東西賡歌太液翻黃鵠

從獵陳倉獲碧雞曉飲豈知金掌迴夜吟應訝玉繩低  
鈞天雖許人間聽閭闔門多夢自迷

哭劉蕡

上帝深居閉九閭巫咸不下問銜冤廣陵別後春濤隔  
湓浦書來秋雨翻只有安仁能作誄何曾宋玉解招魂  
平生風義兼師友不敢同君哭寢門

少年

外戚平羌第一功生平二十有重封直登宣室螭頭上

橫過甘泉豹尾中別館覺來雲雨夢後門歸去蕙蘭叢  
灞陵夜獵隨田實不識寒郊自轉蓬

藥轉

鬱金堂北畫樓東換骨神方上藥通露氣暗連青桂苑  
風聲偏獵紫蘭叢長籌未必輸孫皓香棗何勞問石崇  
憶事懷人兼得句翠衾歸卧繡簾中

杜工部蜀中離席

人生何處不離羣世路干戈惜暫分雪嶺未歸天外使



松州猶駐殿前軍，座中醉客延醒客。  
江上晴雲雜雨雲，美酒成都堪送老。  
當壚仍是卓文君。

二月二日

二月二日江上行，東風日暖聞吹笙。  
花鬚柳眼各無賴，紫蝶黃蜂俱有情。  
萬里憶歸元亮井，三年從事亞夫營。

新灘

一作春

莫悟

一作訝

遊人意更作風簷夜雨聲

籌筆驛

猿

一作魚

鳥猶疑畏簡，書風雲常為護。  
儲胥徒令上將揮。

神筆終見降王走傳車管樂有才終不忝關張無命欲  
何如他年錦里經祠廟梁父吟成恨有餘

九成宮

十二層城閭苑西平時避暑拂虹霓雲隨夏后雙龍尾  
風逐周王八駿蹄吳岳曉光連翠巘甘泉晚景上丹梯  
荔枝盧橘霑恩澤鸞鵲天書濕紫泥

即日

一歲林花即日休江間亭下悵淹留重吟細把真無奈

已落猶開未放愁  
山色正來銜小苑  
春陰只欲傍高樓  
金鞍忽散銀壺漏  
更醉誰家白玉鉤

無題

昨夜星辰昨夜風  
畫樓西畔桂堂東  
身無綵鳳雙飛翼  
心有靈犀一點通  
隔座送鉤春酒暖  
分曹射覆蠟燈紅  
嗟余聽鼓應官去  
走馬蘭臺類斷一作蓬

無題

來是空言去絕踪  
月斜樓上五更鐘  
夢為遠別啼難喚

書被催成墨未濃蠟照半籠金翡翠麝熏微度繡芙蓉  
劉郎已恨蓬山遠更隔蓬山一萬重

颯颯東風細雨來芙蓉塘外有輕雷金蟾齧鎖燒香入  
玉虎牽絲汲井迴賈氏窺簾韓掾少宓妃留枕魏王才  
春心莫共花爭發一寸相思一寸灰

王十二兄與畏之員外相訪見招小飲時予以悼  
亡日近不去因寄

謝傳門庭舊未行今朝歌管屬檀郎更無人處簾垂地

欲拂塵時簾竟床嵇氏幼男猶可憫左家嬌女豈能忘

秋

一作愁

霖腹疾俱難遣萬里西風夜漸長

留贈畏之

清時無事奏明光不遣當關報早霜中禁詞臣尋引領

左川歸客自迴腸郎君下筆驚鸚鵡侍女吹笙弄鳳凰

空寄

一作記

大羅天上事衆仙同日詠霓裳

無題

相見時難別亦難東風無力百花殘春蠶到死絲方盡

蠟炬成灰淚始乾  
曉鏡但愁雲鬢改  
夜吟應覺月光寒  
蓬山此去無多路  
青鳥殷勤為探看

碧城

碧城十二曲闌干  
犀辟塵埃玉辟寒  
閨苑有書多附鶴  
女床無樹不棲鸞  
星沉海底當牕見  
雨過河源隔座看  
若是曉珠明又定  
一生長對水晶盤

對影聞聲已可憐  
玉池荷葉正田田  
不逢蕭史休回首  
莫見洪崖又拍肩  
紫鳳放嬌銜楚佩  
赤鱗狂舞撥湘絃

鄂君悵望舟中夜繡被焚香獨自眠

七夕來時先有期洞房簾箔至今垂玉輪顧兔初生魄  
鐵網珊瑚未有枝檢與神方教駐景收將鳳紙寫相思

武皇內傳分明在莫道人間總不知

此似咏其時貴主  
事唐初公主多自

請出家與二教人媒近商隱同時如文安潯陽平思邵  
陽永嘉永安義昌安康諸主皆先後丐為道士築觀在  
外史即不言他醜于防閑復行召入頗著微辭味詩中  
蕭史一聯及引用董偃水精盤故事大旨已明非止為  
尋常閨閣  
寫艷也

對雪

時欲  
之東

寒氣先侵玉女扉清光旋透省郎闈梅花大庾嶺頭發  
柳絮章臺街裏飛欲舞定隨曹植馬有情應濕謝莊衣  
龍山萬里無多遠留待行人二月歸

旋撲珠簾過粉牆輕於柳絮重於霜已隨江令誇瓊樹  
又入盧家妒玉堂侵夜可能爭桂魄忍寒應欲試梅妝  
關河凍合東西路腸斷斑駁送陸郎

蜂

小苑華池爛漫通後門前檻思無窮  
窈妃腰細纔勝露



趙后身輕欲倚風  
紅壁寂寥崖蜜盡  
碧簾迢遞霧巢空  
青陵粉蝶休離恨  
長定相逢二月中

辛未七夕

恐是仙家好別離  
故教迢遞作佳期  
由來碧落銀河畔  
可要金風玉露時  
清漏漸移相望久  
微雲未接過來遲  
豈能無意酬烏鵲  
惟與蜘蛛乞巧絲

玉山

玉山高與閬風齊  
玉水清流不貯泥  
何處更求回日馭

此中兼有上天梯珠容百斛龍休睡桐拂千尋鳳要棲  
聞道神仙有才子赤簫吹罷好相攜

牡丹

錦幃初卷衛夫人繡被猶堆越鄂君垂手亂翻雕玉佩  
招當作腰爭舞鬱金裙石家蠟燭何曾剪荀令香爐可  
待薰我是夢中傳彩筆欲書花葉寄朝雲

促漏

促漏遙鐘動靜聞報章重疊杳

一作字

難分舞鸞鏡匣收

殘黛睡鴨香爐換夕熏歸去定

一作豈

知還向月夢來何

處更為雲南塘漸暖蒲堪結兩兩鴛鴦護水紋

### 馬嵬

海外徒聞更九州他生未卜此生休空聞虎旅傳宵柝  
無復雞人報曉籌此日六軍同駐馬當時七夕笑牽牛  
如何四紀為天子不及盧家有莫愁

### 可歎

幸會東城宴未迴年華憂共水相催梁家宅裏秦宮入

趙后樓中赤鳳來  
冰簟且眠金縷枕  
瓊筵不醉玉交盃  
宓妃愁坐芝田館  
用盡陳王八斗才

富平少侯

七國三邊未到憂  
十三身襲富平侯  
不收金彈拋林外  
却惜銀牀在井頭  
綵樹轉燈珠錯落  
繡檀迴枕玉雕鏤  
當關不報侵晨客  
新得佳人字莫愁

聖女祠

松篁臺殿蕙香幃  
龍護瑤牕鳳掩扉  
無質易迷三里霧

不寒長著五

一作六

銖衣人間定有崔羅什天上應無劉

武威寄問釵頭雙白燕每朝珠館幾時歸

過伊僕射舊宅

朱邸方酬力戰功華筵俄歎逝波窮迴廊簷斷燕飛去

小閣塵凝人語空幽淚

一作砌

欲乾殘菊露餘香猶入敗

荷風何能更涉瀧江去獨立寒流

一作沙

弔楚宮

銀河吹笙

悵望銀河吹玉笙樓寒院冷接平明重衾幽夢他年斷

別樹羈雌昨夜驚月榭故香因雨發風簾殘燭隔霜清  
不須浪作緱山意湘瑟秦簫自有情

聞歌

歛笑凝眸意欲歌高雲不動碧嵯峨銅臺罷望歸何處  
玉輦忘還事幾多青冢路邊南雁盡細腰宮裏北人過  
此聲腸斷非今日香炷燈光奈爾何

贈華陽宋真人兼寄清都劉先生

淪謫千年別帝宸至今猶識蕊珠人但驚茅許同仙籍

不道一作記劉盧是世親玉檢賜書迷鳳篆金華歸駕冷

龍鱗不因杖履逢周史徐甲何曾有此身

楚宮一作水天  
閒話舊事

月姊曾逢下彩蟾傾城消息隔重簾已聞佩響知腰細  
更辨絃聲覺指纖暮雨自歸山悄悄秋河不動夜厭厭  
王昌且在牆東住未必金堂得免嫌

和友人戲贈

東望花樓會

一作事

不同西來雙燕信休通仙人掌冷三

霄露玉女牕虛五夜風翠袖自隨回雪轉燭房尋類外  
庭空殷勤莫使清香透牢合金魚鑲桂叢

迢遞青門有幾關柳梢樓角見南山明珠可貫須為佩

白壁堪裁且作環子夜休

一作欲

歌團扇掩新正未破剪

刀閑猿啼鶴怨終年事未抵熏爐一夕間

題二首後重有戲贈任秀才

一丈紅薔擁翠筠羅牕不識繞街塵峽中尋覓長逢雨  
月裏依稀更有人虛為錯刀留遠客枉緣書札損文鱗



遙知小閣還斜照羨殺烏龍卧錦茵

重有感

玉帳牙旗得上游安危須共主君憂竇融表已來關右  
陶侃軍宜次石頭豈有蛟龍愁失水更無鷹隼與高秋

晝號夜哭兼幽顯早晚星關雪涕收

錢龍惕箋太和九年十月以前廣州

節度使王茂元為涇原節度使逾月李訓事作茂元在  
涇原故曰得上游也昭義節度使劉從諫三上疏問王  
涯等罪名仇士良聞之惕懼故曰竇融表已來關右也  
初獲鄭注京師戒嚴涇原鄜坊節度使王茂元蕭弘皆  
勒兵備非常故曰陶侃軍宜次石頭也士良輩知事連  
天子相與怨憤帝懼偽不語宜人得肆志殺戮則蛟龍

而失水矣曰豈有者諱之也涯等既死舉朝脅息諸藩鎮亦皆觀望不前誰為高秋之鷹隼快意于一擊乎曰更無者傷之亦望之也至于晝號夜哭雪涕星闕而感之者益深悲夫

### 深宮

金殿銷香閉綺櫳

一作籠

玉壺傳點

一作響

咽銅龍狂飈不

惜蘿陰薄清露偏知桂葉濃斑竹嶺邊無限淚景陽宮

裏及時鐘豈知為雨為雲處

一作意

只有高唐十二峯

### 鄭州獻從叔舍人褰

蓬島烟霞閬苑鐘三官箋奏附金龍茅君奕世仙曹貴

許掾全家道氣濃  
絳簡尚參黃紙案  
丹爐猶用紫泥封  
不知他日華陽洞  
許上經樓第幾重

安定城樓

迢遞高城百尺樓  
綠楊枝外盡汀洲  
賈生年少虛垂淚  
王粲春來更遠遊  
永憶江湖歸白髮  
欲迴天地入扁舟  
不知腐鼠成滋味  
猜意鴛鴦竟未休

隋宮守歲

消息東郊木帝迴  
宮中行樂有新梅  
沈香甲煎為庭燎

玉液瓊蘇作壽杯遙望露盤疑是月遠聞鼉鼓欲驚雷  
昭陽第一傾城客不踏金蓮不肯來

茂陵

漢家天馬出蒲梢苜蓿榴花遍近郊內苑只知含

一作衡

鳳背屬車無復插雞翹玉桃偷得憐方朔金屋修

一作妝

成貯阿嬌誰料蘇卿老歸國茂陵松柏雨蕭蕭

淚

永巷長年怨綺羅離情終日思風波湘江竹上痕無限

峴首碑前灑幾多人去紫臺秋入塞兵殘楚帳夜聞歌  
朝來灞水橋邊問未抵青袍送玉珂

七月二十九日崇讓宅讌作

露如微霰下前池月

一作風

過迴塘萬竹悲浮世本來多

聚散紅蕖何事亦離披  
悠揚歸夢唯燈見  
蘆落生涯獨酒知  
豈到白頭長只爾  
嵩陽松雪有心期

贈從兄閬之

悵望人間萬事違  
私書幽夢約忘機  
荻花村裏魚標在

石蘚庭中鹿跡微幽徑定攜僧共入寒塘好與月相依  
城中獬犬憎蘭佩莫損幽芳久不歸

梓州罷吟寄同舍

不揀花朝與雪朝五年從事霍嫖姚君緣接座交珠履  
我為分行近翠翹楚雨含情皆有託漳濱卧病竟無憐  
長吟遠下燕臺去惟有衣香染未銷

無題

鳳尾香羅薄幾重碧文圓頂夜深縫扇裁月魄羞難掩

車走雷聲語未通曾是寂寥金爐暗斷無消息石榴紅  
斑駁只繫垂楊岸何處西南任好風

重幃深下莫愁堂卧後清宵細細長神女生涯原是夢  
小姑居處本無郎風波不信菱枝弱月露誰教桂葉香  
直道相思了無益未妨惆悵是清狂

汴上送李郢之蘇州

人高詩苦滯夷門萬里梁王有舊園烟幌自應憐白紵  
月樓誰伴咏黃昏露桃塗頰依苔井風柳誇腰住水村

蘇小小墳今在否紫蘭香徑與招魂

贈鄭謹處士

浪迹江湖白髮新浮雲一片是吾身寒歸山觀隨碁局  
暖入汀洲逐釣綸越桂留烹張翰鱠蜀薑供煮陸機尊  
相逢一笑憐疎放他日扁舟有故人

復至裴明府所居

伊人卜築自幽深桂巷杉籬不可尋柱上雕蟲對書字  
槽中瘦馬仰聽琴求之流輩豈易得行矣闕山方獨吟



賒取松醪一斗酒與君相伴灑煩襟

子初郊墅

看山對酒君思我聽鼓離城我訪君  
臘雪已添墻下水  
齋鐘不散檻前雲陰移竹柏濃還淡  
歌雜漁樵斷更聞  
亦擬村南買烟舍子孫相約事耕耘

當句有對

密邇

一作爾

平陽接上蘭秦樓鴛瓦漢宮盤池光不定花

光亂日氣初涵露氣乾但覺游蜂饒舞蝶豈知孤鳳憶

離鸞三星自轉三山遠紫府程遙碧落寬

井絡

井絡天彭一掌中漫誇天設劍為峰陣圖東聚燕

當作變

江石邊柝西懸雪嶺松堪歎

一作笑

故君成杜宇可能先

主是真龍將來為報奸雄輩莫向金牛訪舊踪

寫意

燕雁迢迢隔上林高秋望斷正長吟人間路有潼江險  
天外山惟玉壘深日向花間留返照雲從城上結層陰

三年已制思鄉淚更入新年恐不禁

隨師東

東征日調萬黃金幾竭中原買鬪心軍令未聞誅馬謖  
捷書唯是報孫歆但須驚驚巢阿閣豈假鷓鴣在泮林

可惜前朝玄菟郡積骸成莽陣雲深

太和元年李同捷盜據滄景詔烏重

胤王智興康志睦史憲誠李載義李聽張璠各率本道  
兵討之二年九月命諸軍進討王庭湊十月憲誠及同  
捷戰于平原屢敗之載義又敗之于長蘆柳公濟敗庭  
湊于新樂又敗之于博野劉從諫又敗之于昭慶時諸  
軍討同捷久未成功每有小勝輒虛張首虜以邀厚賞  
朝廷竭力奉之饋運不給滄州喪亂之後骸骨蔽地城

空野曠戶口什無三四  
詳詩中語正此時事也

宋玉

何事荆臺百萬家  
惟教宋玉擅才華  
楚辭已不饒  
唐勒風賦何曾讓  
景差落日渚宮供  
觀閣開年雲夢送  
煙花  
可憐庾信尋荒徑  
猶得三朝託後車

韓同年新居餞韓西迎家室戲贈

籍籍征西萬戶侯  
新緣貴壻起珠樓  
一名我漫居先甲  
千騎君翻在上頭  
雲路招邀迴綵鳳  
天河迢遞笑牽牛

南朝禁衛無人近，瘦盡瓊枝詠四愁。

柳

江南江北雪初消，漠漠輕黃惹嫩條。  
灞岸已攀行客手，楚宮先騁舞姬腰。  
清明帶雨臨官道，晚日含風拂野橋。  
如線如絲正牽恨，王孫歸路一何遙。

九日

曾共山翁把酒時，霜天白菊繞堦墀。  
十年泉下無人問，九日樽前有所思。  
不學漢臣栽苜蓿，空教楚客咏江離。

郎君官貴施行馬東閣無因再得窺

北夢瑣言云李商

隱員外依彭陽令  
狐楚以箋奏受知相國既没子絢繼有韋平之拜疎隴  
西未嘗展分重陽日義山詣宅于廳事上留題云云絢  
覩之慙悵乃扃閉此廳終身不處唐詩紀事云絢惡  
商隱從鄭亞之辟疎之重陽日商隱留詩于其廳事絢  
乃補太學博士錢龍惕箋文宗時李宗閔牛僧孺令  
狐楚與李德裕大相仇怨德裕相武宗五年雖未嘗忘  
情于太牢然救楊嗣復李珣之死猶有大臣之度大中  
初立贊皇萌驂乘之禍令狐絢當國舉贊皇之客誅剪  
無子遺矣義山自開成登第後累辟王茂元鄭亞盧弘  
正府三人皆太尉委用故絢尤深惡之十年秉政抑之  
終于使府絢真  
險刻寡恩哉

天平公座中呈令狐令公時蔡京在座京曾為僧

徒故有第五句

罷執霓旌上醮壇  
慢妝嬌樹水晶盤  
更深欲訴蛾眉歛  
衣薄臨醒玉豔寒

座中必有官妓故云

白足禪僧思敗道  
青袍御

史擬休官雖然同是將軍客  
不敢公然子細看

水齋

多病欣依有道邦  
南塘晏起想秋江  
卷簾飛燕還拂水  
開戶暗蟲猶打窓  
更閱前題已披卷  
仍斟昨夜未開缸  
誰人為報故交道  
莫惜鯉魚時一雙

和人題真娘墓

虎丘山下劍池邊長遣遊人歎逝川  
胃樹斷絲悲舞席出雲清梵想歌筵  
柳眉空吐效顰葉榆英還飛買笑錢  
一自香魂招不得祇應江上獨嬋娟

春日寄懷

世間榮落重逡巡我獨丘園坐四春  
縱使有花兼有月可堪無酒又無人  
青袍似草年年定白髮如絲日日新  
欲逐風波千萬里未知何路到龍津



自貶

陶令去官後仰眠書屋中誰將五斗米擬換北牕風

朝桃

無賴天桃面平明露井東春風為開了却擬笑春風

妓席

樂府聞桃葉人前道得無勸君書小字慎莫喚官奴

王獻

之小字官奴妾  
桃葉樂府有歌

登樂遊原

向晚意不適驅車登古原夕陽無限好只是近黃昏

漫成

沈約憐何遜延年毀謝莊清新俱有得名譽底相傷  
霧夕詠芙蓉何郎得意初此時誰最賞沈范兩尚書

霜月

初聞征雁已無蟬百尺高樓水接天青女素娥俱耐冷  
月中霜裏鬪嬋娟

華山題王母祠

蓮花峯下鎖雕梁此去瑤池地共長好為麻姑到東海  
勸栽黃竹莫栽桑

華清宮

華清恩幸古無倫猶恐蛾眉不勝人未免被他褒女笑  
只教天子暫蒙塵

北齊

一笑相傾國便亡何勞荊棘始堪傷小憐玉體橫陳夜  
已報周師入晉陽

巧笑知堪敵萬幾傾城最在著戎衣晉陽已陷休回顧  
更請君王獵一圍

復京

虜騎燕兵一戰摧萬靈回首賀軒臺天教李令心如日  
可要昭陵石馬來

渾河中

九廟無塵八馬回奉天城壘長春苔咸陽原上英雄骨  
半向君家養馬來

咸陽

咸陽宮闕鬱嵯峨六國樓臺艷綺羅自是當時天帝醉  
不關秦地有山河

夜雨寄北

君問歸期未有期巴山夜雨漲秋池何當共剪西牕燭  
却話巴山夜雨時

宿駱氏亭寄懷崔雍崔衮

竹塢無塵水檻清相思迢遞隔重城秋陰不散霜飛晚

留得枯荷聽雨聲

夢澤

夢澤悲風動白茅  
楚王葬盡滿城嬌  
未知歌舞能多少  
虛減宮厨為細腰

贈歌伎

水精如意玉連環  
下蔡城危莫破顏  
紅綻櫻桃含白雪  
斷腸聲裏唱陽關

白日相思可奈何  
嚴城清夜斷經過  
只知解道春來瘦

不道春來獨自多

寄令狐郎中

嵩雲春樹久離居  
雙鯉迢迢一紙書  
休問梁園舊賓客  
茂陵秋雨病相如

杜司勳

高樓風雨感斯文  
短翼差池不及羣  
刻意傷春復傷別  
人間唯有杜司勳

無題

聞道閭門萼綠華昔年相望抵

一作尚

天涯豈知一夜秦

樓客偷看吳王苑內花

漢宮詞

青雀西飛竟未回君王長在集靈臺  
侍臣最有相如渴  
不賜金莖露一杯

席上作

并序

予為桂州從事故府鄭公出家妓令賦高唐詩  
淡雲輕雨拂高唐玉殿秋來夜正長  
料得也應憐宋玉



一生唯事楚襄王

無題

紫府仙人號寶燈  
雲漿未飲結成冰  
如何雪月交光夜  
更在瑤臺十二層

柳

曾逐東風拂舞筵  
樂遊春苑斷腸天  
如何肯到清秋日

已帶斜陽又帶蟬

楊慎曰形容先  
榮後悴之意

留贈畏之

待得郎來月已低寒暄不道醉如泥五更又欲向何處  
騎馬出門烏夜啼

夜半

三更三點萬家眠露欲為霜月墮煙闌鼠上堂蝙蝠出  
玉琴時動綺窓絃

飲席代官妓贈兩從事

新人橋上著春衫舊主江邊側帽簷願得化為紅綬帶  
許教雙鳳一時銜

詠史

北湖南埭水漫漫一片降旗百尺竿  
三百年間同曉夢鍾山何處有龍盤

華清宮

朝元閣迴羽衣新首按昭陽第一人  
當日不來高處舞可能天上有邊塵

齊宮詞

永壽兵來夜不扃金蓮無復印中庭  
梁臺歌管三更罷

猶自風搖九子鈴

青陵臺

青陵臺畔日光斜萬古貞魂倚暮霞  
莫訝韓憑為蛺蝶等閒飛上別枝花

漢宮

通靈夜醮達清晨承露盤晞甲帳春  
王母不來一作西歸方朔去更須重見李夫人

讀任彥昇碑

任昉當年有美名  
可憐才調最縱橫  
梁臺初建應惆悵  
不得蕭公作騎兵

宮妓

珠箔輕明拂玉墀  
披香新殿鬪腰支  
不須看盡魚龍戲  
終遣君王怒偃師

宮辭

君恩如水向東流  
得寵憂移失寵愁  
莫向樽前奏花落  
涼風只在殿西頭

代贈

樓上黃昏欲望休  
玉梯橫絕月中鉤  
芭蕉不展丁香結  
同向春風各自愁  
東南日出照高樓  
樓上離人唱石州  
總把春山掃眉黛  
不知供得幾多愁

楚吟

山上離宮宮上樓  
樓前宮畔暮江流  
楚天長短黃昏雨  
宋玉無愁亦是愁

瑤池

瑤池阿母綺牕開  
黃竹歌聲動地哀  
八駿日行三萬里  
穆王何事不重來

南朝

地險悠悠天險長  
金陵王氣應瑤光  
休誇此地分天下  
只得徐妃半面妝

題漢祖廟

乘運應須宅八荒  
男兒安得戀池隍  
君王自起新豐後

項羽何曾在故鄉

韓冬郎即席為詩相送一座盡驚他日余方追吟  
連宵侍坐徘徊久之句有老成之風因成二絕  
寄酬兼呈畏之員外

十歲裁詩走馬成冷灰殘燭動離情桐花萬里丹山路  
雛鳳清於老鳳聲

劍棧風檣各苦辛別時冰雪到時春為憑何遜休聯句  
庾盡東陽姓沈人



驪山有感

驪岫飛泉泛暖香  
九龍呵護玉蓮房  
平明每幸長生殿  
不從金輿惟壽王

過楚宮

巫峽迢迢舊楚宮  
至今雲雨暗丹楓  
微生盡戀人間樂  
只有襄王憶夢中

龍池

龍池賜酒敞雲屏  
羯鼓聲高衆樂停  
夜半宴歸宮漏永

薛王沉醉壽王醒

嫦娥

雲母屏風燭影深  
長河漸落曉星沈  
嫦娥應悔偷靈藥  
碧海青天夜夜心

賈生

宣室求賢訪逐臣  
賈生才調更無倫  
可憐夜半虛前席  
不問蒼生問鬼神

西亭

此夜西亭月正圓  
疎簾相伴宿風煙  
梧桐莫更翻清露  
孤鶴從來不得眠

槿花

風露淒淒秋景繁  
可憐榮落在朝昏  
未央宮裏三千女  
但保紅顏莫保恩

和韋潘前輩七月十二日夜泊池州城下先寄上  
李使君

桂含爽氣三秋首  
莫吐中旬二葉新  
正是澄江如練處

元暉應喜見詩人

訪人不遇留別館

卿卿不惜鎖牕春去作長楸走馬身閒倚繡簾吹柳絮  
日高深院斷無人

寄惱韓同年時韓住蕭洞

簾外辛夷定已開開時莫放艷陽回年華若到經風雨  
便是胡僧話劫灰

龍山晴雪鳳樓霞洞裏迷人有幾家我為傷春心自醉

不勞君勸石榴花

假日

素琴絃斷酒瓶空  
倚坐欹眠日已中  
誰向劉伶天幕內  
更當陶令北牕風

李衛公

絳紗弟子音塵絕  
鸞鏡佳人舊會稀  
今日致身歌舞地  
木棉花暖鷓鴣飛

偶題

小亭閒眠微醉消山榴海柏枝相交水紋簾上琥珀枕  
傍有墮釵雙翠翹

清月依微香露輕曲房小院多逢迎春叢定是饒樓鳥  
飲罷莫持紅燭行

夜冷

樹繞池寬月影多村砧塢笛隔風蘿西亭翠被餘香薄  
一夜將愁向敗荷

同崔入詣藥山訪融師

共受征南不次恩  
報恩惟是有忘言  
巖花澗草西北路  
未見高僧只見猿

無題

一云  
陽城

白道縈迴入暮霞  
斑駁嘶斷七香車  
春風自共何人笑  
枉破陽城十萬家

失題

家近紅蕖曲水濱  
全家羅襪起秋塵  
莫將越客千絲網  
網得西施別贈人

春日

欲入盧家白玉堂  
新春催破舞衣裳  
蝶銜紅蕊蜂銜粉  
共助青樓一日忙

蝶

一作無題

壽陽公主嫁時妝  
八字宮眉捧額黃  
見我佯羞頻照影  
不知身屬冶遊郎

為有

為有雲屏無限嬌  
鳳城寒盡怕春宵  
無端嫁得金龜婿



辜負香衾事早朝

江東

驚魚撥刺燕翩翹  
獨自江東上釣船  
今日春光太漂蕩  
謝家輕絮沈郎錢

離亭賦得折楊柳

暫憑樽酒送無憀  
莫損愁眉與細腰  
人世死前惟有別  
春風爭擬惜長條

含煙惹霧每依依  
萬緒千條拂落暉  
為報行人休盡折

半留相送半迎歸

莫愁

雪中梅下與誰期  
梅雪相兼一萬枝  
若是石城無艤子  
莫愁還似有愁時

評事翁寄餽粥走筆為答

粥香餽白杏花天  
省對流鶯坐綺筵  
今日寄來春已老  
鳳樓迢遞憶秋千

東阿王

國事分明屬灌均  
西陵魂斷夜來人  
君王不得為天子  
半為當時賦洛神

寄成都高苗二從事

時二公從事商隱  
座主第原註

紅蓮幕下紫梨新  
命斷湘南病渴人  
今日問君能寄否  
二江風水接天津

西南行却寄相送者

百里陰雲覆雪泥  
行人只在雪雲西  
明朝驚破還鄉夢  
定是陳倉碧野雞

有感

非關宋玉有微辭，却是襄王夢覺遲。  
一自高唐賦成後，楚天雲雨盡堪疑。

憶住

一作匡

一師

無事經年別遠公，帝城鐘曉憶西峯。  
爐烟消盡寒燈晦，童子開門雪滿松。

送王十三校書分司

多少分曹掌秘文，洛陽花雪夢隨君。  
定知何遜緣聯句，

每到城東憶范雲

舊將軍

雲臺高議正紛紛誰定當時蕩寇勲  
日暮灞陵原上獵  
李將軍是故將軍

曼倩辭

十八年來墮世間  
瑤池歸夢碧桃閒  
如何漢殿穿鍼夜  
又向牕中覩阿環

漫成

沈宋裁辭矜變律王楊落筆得良朋當時自謂宗師妙  
今日惟觀對屬能

李杜操持事畧齊三才萬象共端倪集仙殿與金鑾殿  
可是蒼蠅惑曙雞

正月十五夜聞京有燈恨不得觀

月色燈光滿帝都香車寶輦隘通衢身閒不覩中興盛  
羞逐鄉人賽紫姑

御定全唐詩錄卷七十七

欽定四庫全書

御定全唐詩錄卷七十八

溫庭筠

庭筠并州祁人貞觀宰相彥博後本名岐字飛卿  
少敏悟工為辭章與李商隱齊名號溫李大中中  
應舉京師佻蕩不脩檢幅多作側辭艷曲與貴胄  
誦飲狎昵又舉場多為人假手執政惡之貶授方  
山尉徐商鎮襄陽署為巡官

時與段成式周繇韋  
蟾弟庭皓同在幕府

多倡和之什

咸通中失意歸江東令狐綯方鎮淮南庭

筠怨居中時不為助力過府不肯謁與少年狂遊

乞索楊子院夜醉為邏卒毆傷訴於綯綯不為理

庭筠與綯子滿遊素出綯之門宣宗愛唱菩薩蠻詞綯嘗假庭筠撰密進之戒令勿他泄而遽言於

人由是疎之又訊綯無學每云

中書堂内生將軍失散或以此事聞京師庭筠徧

見公卿雪冤屬徐商知政事頗右之白用為國子

助教會商罷相見廢卒庭筠著述頗多為詩韻格

清拔文士稱之



北夢瑣言云庭筠才思艷麗工為小賦每入試押  
官韻作賦凡八叉手而八韻成常為隣鋪作文號  
曰救數人沈侍郎知舉因別施鋪席授庭筠不令  
與諸人鄰比宣宗好微行遇溫於逆旅溫不識傲  
然詰之曰公非司馬長史之流耶又曰得非六參  
簿尉之類帝曰非也後坐謫其制詞曰徒負不羈  
之才罕有適時之用云云

全唐詩話云庭筠善於屬對李義山嘗謂之曰近

得聯句云遠比趙公三十六年宰輔未得偶句曰  
何不云近同郭令二十四考中書宣宗嘗賦詩上  
句有金步搖未能對遣求進士對之庭筠以玉條  
脫對帝賞焉又藥名有白頭翁以蒼耳子為對初  
會昌毀寺時分遣御史檢天下所廢寺及收錄金  
銀佛像有蘇監察者巡檢兩街諸寺見銀佛一尺  
已下者多袖之而歸人謂之蘇捏佛或問庭筠將  
何對遽曰無以過蜜陀僧也他多類此

唐詩紀事云令狐綯曾以舊事訪於庭筠對曰事  
出南華非僻書也或冀相公變理之暇時宜覽古  
綯益怒奏庭筠有才無行卒不得第庭筠有詩曰  
因知此恨人多積悔讀南華第二篇

彥周詩話云段成式與溫庭筠雲藍紙詩序曰予  
在九江出意造雲藍紙輒分送五十枚其詩曰三

十六鱗充使時數番猶得表相思

唐詩紀事下有  
待將袍襖重鈔

了盡寫襄陽  
描拈詞

蓋龍八十一鱗鯉三十六鱗也

桐薪云溫貌甚陋號鍾馗不稱才名最善鼓琴吹  
笛云有絲即彈有孔即吹不必柯亭爨桐著乾膜  
子今其書不傳

古體詩

俠客行

欲出鴻都門陰雲蔽城闕寶劍黯如水微紅濕餘血白  
馬夜頻嘶三更灞陵雪

江南曲

妾家白蘋浦日上芙蓉櫂  
輶輶搖槳聲移舟入茭葉谿  
長菱葉深作底難相尋  
辟郎郎不見灘驚自浮沈  
拾萍萍無根采蓮蓮有子  
不作浮萍生寧為藕花死  
岸傍騎馬郎烏帽紫游韁  
含愁復含笑回首問橫塘  
妾住金陵浦門前朱雀航  
流蘇持作帳芙蓉持作梁  
出入金犢幘兄弟侍中郎  
前年學歌舞定得郎相許  
連娟眉繞山依約腰如杵  
鳳管悲若咽鸞弦嬌欲語  
扇薄露紅鉛羅輕壓金縷  
明月西南樓珠簾玳瑁鉤  
橫波巧能笑鸞蛾不

識愁花開子留樹草長根依土早聞金溝遠底事歸郎  
許不學楊白花朝朝淚如雨

故城曲

漠漠沙隄煙隄西雉子斑雉聲何角角麥秀桑陰閒游  
絲蕩平綠明滅時相續白馬金絡頭東風故城曲故城  
殷貴嬪曾占未來春自從香骨化飛作馬蹄塵

西洲詞 吳聲

悠悠復悠悠昨日下西洲西洲風色好遙見武昌樓武

昌何鬱鬱懷家定無匹小婦被流黃登樓撫瑤瑟朱絃  
繁復輕素手直淒清一彈三四解掩抑似含情南樓登  
且望西江廣復平艇子搖兩槳催過石頭城門前烏白  
樹慘澹天將曙灘鷺飛復還郎隨早帆去迴頭語同伴  
定復負情儂去帆不安幅作底使西風他日相尋索莫  
作西洲客西洲人不歸春草年年碧

燒歌

起來望南山山火燒山田微紅夕如滅短燄復相連差

差向巖石冉冉凌青壁低隨回風盡遠照檐茅赤鄰翁  
能楚言倚鐻欲潸然自言楚越俗燒畝作早田豆苗蟲  
促促籬上花當屋廢棧豕歸闌廣場雞啄粟新年春雨  
晴處處賽神聲持錢就人卜敲瓦隔林鳴卜得山上卦  
歸來桑棗下吹火向白茅膏鑱映蘋蔗風驅榭葉煙榭  
樹連平山迸星拂霞外飛燼落階前仰面呻復嚏雅孃  
咒豐歲誰知蒼翠容盡作官家稅

嘲春風



春風何處好別殿饒芳草  
冉冉轉驚旂歲蕤吹雉葆揚  
芳歷九門澹蕩入蘭蓀爭奈白團扇時時偷主恩

碌碌古詞

左亦不碌碌右亦不碌碌  
野草自根肥羸牛生健犢融  
蠟作杏蒂男兒不戀家  
春風破紅意女頰如桃花  
忠言未見信巧語翻咨嗟  
一鞘無兩刃徒勞油壁車

和沈參軍招友生觀芙蓉池

桂棟坐清曉瑤琴商鳳絲  
况聞楚澤香適與秋風期  
遂

從棹萍客靜嘯烟草湄倒影回澹蕩愁紅媚漣漪湘莖  
久鮮澀宿雨增離披而我江海客楚游勤夢思北渚水  
雲葉南塘烟露枝豈無臺榭芳獨與鷗鳥知珠墜魚迸  
淺影多鳬泛遲落英不可攀返照昏澄陂

秋日

爽氣變昏旦神皋徧原隰烟華久蕩搖石澗仍清急柳  
閭山犬吠蒲流水禽立菊花明欲迷棗葉光如濕天籟  
思林嶺車塵倦都邑譙張夙所違悔恡何由入芳草秋

可藉幽泉曉堪汲牧羊燒外鳴林果雨中拾復此遂閒  
曠脩然脫羈紲田收鳥雀喧氣肅龍蛇蟄佳節足豐穰  
良朋阻遊集沈幾日寂寥葆素常呼吸投迹倦攸往放  
懷志所執良時有東菑吾將事蓑笠

酬友人

辭榮亦素尚倦遊非夙心寧復思金籍獨此卧烟林間  
雲無定貌佳樹有餘陰坐久芰荷發釣闌菱葦深游魚  
自搖漾浴鳥故浮沈唯君清露夕一為灑煩襟

黃曇子歌

參差綠蒲短搖艷雲塘滿紅激蕩融融鷺翁灘鷺暖萋  
芊小成路馬上脩蛾懶羅衫裊向風點粉金鸞卵

鴻臚寺有開元中錫宴堂樓臺池沼雅為勝絕荒  
涼遺趾僅有存者偶成四十韻

明皇昔御極神聖垂耿光沈幾發雷電逸躅陵堯湯西  
單積石山北至窮髮鄉四凶有獬廌一臂無螳螂嬋娟  
得神艷郁烈聞國香紫條鳴羯鼓玉管吹霓裳祿山未

封侯林甫才為郎昭融廓日月妥貼安紀綱羣生到壽域百辟趨明堂四海正夷宴一塵不飛揚天子自遊豫侍臣宜樂康軋然閭闔開赤日生扶桑玉砌露盤紆金壺漏丁當劒佩相擊觸左右隨趨鏘玄珠十二旋紅粉三千行盼睐生羽翼叱嗟回雪霜神霞凌雲閣春水驪山陽盤闢九子稷甌擎五雲聚雙瓊京兆博七鼓邯鄲倡遙趨碧雞闕龍葱翠雉揚仗官繡蔽膝寶馬金鏤錫椒塗隅鸚鵡柘彈驚鴛鴦猗歟華國臣鬢髮俱蒼蒼錫

宴得佳致車從真煒煌畫鷁照魚鼈鳴騶亂鶩鷁颭  
蕩碧波炫煌迷橫塘縈盈舞回雪宛轉歌遠梁豔帶畫  
銀絡寶梳金鈿筐沈冥類漢相醉倒疑楚狂一旦紫微  
東旄星森耀芒憑陵逐鯨鯢唐突驅豺狼縱火三月赤  
戰塵千里黃箬函與府寺從此俱荒涼茲地乃蔓草故  
基摧壞牆枯池接斷岸唧唧啼寒蠶敗荷塌作泥死竹  
森如槍遊人問老吏相對聊感傷豈必見麋鹿然後堪  
回腸幸今遇太平令節稱羽觴誰知曲江鴈歲歲棲鸞

皇

寒食節日寄楚望

芳蘭無意綠弱柳何窮縷心斷入淮山夢長穿楚雨絲  
花如二八好月當三五愁碧玉竟平臯韶紅換幽圃流鶯  
隱員樹乳燕喧餘哺曠望戀曾臺離憂集環堵當年不  
自遣晚得終何補鄭谷有樵蘇歸來要腰斧

家乏兩千萬時當一百五颼颼楊柳風穰穰櫻桃雨年  
芳苦沈潦心事如摧櫓金犢近蘭汀銅龍接花塢青葱

建楊宅隱幃端門鼓綵素拂庭柯輕毬落鄰圃三春謝  
游行一笑牽規矩獨有恩澤侯歸來看楚舞

雞鳴埭歌

南朝天子射雉時銀河耿耿星參差銅壺漏斷夢初覺  
寶馬塵高人未知魚躍蓮東蕩宮治濛濛御柳懸棲鳥  
紅妝萬戶鏡中春碧樹一聲天下曉盤踞勢窮三百年  
朱方殺氣成愁烟彗星拂地浪連海戰鼓渡江塵漲天  
繡龍畫雉填宮井野火風驅燒九鼎殿巢江燕砌生蒿



十二金人霜炯炯  
竿綿平綠臺城基  
暖色春空荒古陂  
寧知玉樹後庭曲  
留待野棠如雪枝

織錦詞

丁東細漏侵瓊瑟  
影轉高梧月初出  
簇簇金梭萬縷紅  
鴛鴦豔錦初成匹  
錦中百結皆同心  
縈亂雲盤相間深  
此意欲傳傳不得  
玫瑰作柱朱弦琴  
為君裁破合歡被  
星斗迢迢共千里  
象齒熏鑪未覺秋  
碧池已有新蓮子

夜宴謠

長釵墜髮雙蜻蜓碧盡山斜開畫屏虬須公子五侯客  
一飲千鍾如建瓴驚咽妬唱圓無節眉斂湘烟袖回雪  
清夜恩情四座同莫令溝水東西別亭亭蠟淚香珠殘  
暗露曉風羅幕寒飄飄戟帶儼相次二十四枝龍畫竿  
裂管縈弦共繁曲芳尊細浪傾春醪高樓客散杏花多  
脈脈新蟾如瞪目

蓮浦謠

鳴橈軋軋谿溶溶廢綠平烟吳苑東水清蓮媚兩相向

鏡裏見愁愁更紅  
白馬金鞭大隄上  
西江日夕多風浪  
荷心有露似驪珠  
不是真圓亦搖蕩

東郊行

鬪雞臺下東西道  
柳覆斑駁蝶繁草  
塊靄韶容銷澹愁  
青筐葉盡蠶應老  
綠渚幽香生白蘋  
差差小浪吹魚鱗  
王孫騎馬有歸意  
林彩著空如細塵  
安得人生各相守  
燒船破棧休馳走  
世上方應無別離  
路傍更長千枝柳

塞寒行

燕弓弦勁霜封瓦，樸簌寒雕睇平野。  
一點黃塵起雁喧，白龍堆下千蹄馬。  
河源怒觸風如刀，剪斷朔雲天更高。  
晚出榆關逐征北，驚沙飛迸衝貂袍。  
心許凌烟名不滅，年年錦字傷離別。  
彩毫一畫竟何榮，空使青樓淚成血。

謝公墅歌

朱雀航南繞香陌，謝郎東墅連春碧。  
鳩眠高柳日方融，綺榭飄颻紫庭客。  
文楸方罫花參差，心陳未成星滿池。  
四座無喧梧竹靜，金蟬玉柄俱持頤。  
對局含嘖見千里。

都城已得長蛇尾江南王氣繫疎襟未許符堅過淮水  
郭處士擊甌歌

估粟金蚪石潭古勺陂潏潏幽脩語湘君寶馬上神雲  
碎佩叢鈴滿烟雨吾聞三十六宮花離離輭風吹春星  
斗稀玉晨吟磬破昏夢天露未乾香著衣蘭釵委墜垂  
雲髮小轡丁當逐迴雪晴碧烟滋重疊山羅屏半掩桃  
花月太平天子駐雲車龍鑪勃鬱雙螭拏宮中近臣抱  
扇立侍女低鬟落翠花亂珠觸續正跳蕩傾頭不覺金

烏斜我亦為君長歎息  
緘情遠寄愁無色  
莫露香夢綠  
楊絲千里春風正無力

醉歌

檐柳初黃燕初乳  
曉碧芊緜過微雨  
樹色深含臺榭情  
鶯聲巧作煙花主  
錦袍公子陳杯觴  
撥醅百甕春酒香  
入門下馬問誰在  
降階握手登華堂  
臨卽美人連山眉  
低抱琵琶含怨思  
朔風繞指我先笑  
明月入懷君自知  
勸君莫惜金尊酒  
年少須臾如覆手  
辛勤到老慕簞瓢

於我悠悠竟何有洛陽盧仝稱文房妻子脚禿舂黃糧  
阿耨光頭不識字指揮豪雋如驅羊天犀壓斷朱鼯鼠  
瑞錦驚飛金鳳皇其餘豈足露牙齒欲用何能報天子  
駕馬垂頭搶冥塵驂騑一日行千里但有沈冥醉客家  
支頤瞪目持流霞唯恐南園風雨作碧蕪狼藉棠梨花  
慎惱曲

蕩絲作線難勝鍼  
黛粉染黃那得深  
玉白蘭芳不相顧  
青樓一笑輕千金  
莫言自古皆如此  
健劒刺鐘鉛繞指

三秋庭綠盡迎霜唯有荷花守紅死廬江小吏朱斑輪  
柳縷吐牙香玉春兩股金釵已相許不令獨作空成塵  
悠悠楚水流如馬恨紫愁紅滿平野野土千年怨不平  
至今燒作鴛鴦瓦

春曉曲

家臨長信往來道乳燕雙雙拂烟草油壁車輕金犢肥  
流蘇帳曉金雞早籠中嬌鳥暖猶睡簾外落花閒不掃  
衰桃一樹近前池似惜紅顏鏡中老



春愁曲

紅絲穿露珠簾冷百尺啞啞下纖綆遠翠愁山入卧屏  
兩重雲母空烘影涼簪墜髮春眠重玉兔煨香柳如夢  
錦疊空床委墜紅颼颼埽尾雙金鳳蠶喧蝶駐俱悠揚  
柳拂赤闌纖草長覺後梨花委半綠春風和雨吹池塘

晚歸曲

格格水禽飛帶波孤光斜起夕陽多湖西山淺似相笑  
菱刺惹衣攢黛蛾青絲繫船向江木蘭芽出土吳江曲

水極晴搖泛艷紅草平春染烟綿綠玉鞭騎馬白玉兒  
刻金作鳳光參差丁丁暖漏滴花影催入景陽人不知  
彎隄弱柳遙相矚雀扇員員掩香玉蓮塘艇子歸不歸  
柳暗桑穠聞布穀

張靜婉採蓮曲

并序

靜婉羊侶伎也其容絕世侶自為採蓮二曲今  
樂府所存失其故意因歌以俟采詩者事具載

梁史

蘭膏墜髮紅玉春燕釵拖頸拋盤雲城西楊柳向橋晚  
門前溝水波粼粼麒麟公子朝天客珂馬璫璫度春陌  
掌中無力舞衣輕剪斷鮫綃破春碧抱月飄烟一尺罽  
麝臍龍髓憐嬌饒秋羅拂水碎光連露重花多香不銷  
灘驚交交塘水滿綠萍金粟蓮莖短一夜西風送雨來  
粉痕零落愁紅淺船頭折藕絲暗牽藕根蓮子相留連  
郎心似月月易缺十五十六清光圓

錦城曲

蜀山攢黛留晴雪，簷筍巖牙縈九折。  
江風吹巧翦霞綃，花上千枝杜鵑血。  
杜鵑飛入巖下叢，夜呌思歸山月中。  
巴水漾情情不盡，文君織得春機紅。  
怨魄未歸芳草死，江頭學種相思子。  
樹成寄與望鄉人，白帝荒城五千里。

錢唐曲

錢唐岸上春如織，淼淼寒潮帶晴色。  
淮南遊客馬連嘶，碧草迷人歸不得。  
風飄客意如吹烟，纖指殷勤傷雁弦。  
一曲堂堂紅燭筵，金鯨瀉酒如飛泉。

舞衣曲

藕腸纖縷抽輕春烟機漠漠嬌蛾顰金梭浙瀝透空薄  
剪落交刀吹斷雲張家公子夜聞雨夜向蘭堂思楚舞  
蟬衫麟帶壓愁香偷得鵲簪鎖金縷管含蘭氣嬌語悲  
胡槽雪腕駕鴛鴦絲芙蓉力弱應難定楊柳風多不自持  
回顰笑語西窗客星斗寥寥波脉脉不逐秦王卷象牀  
滿樓明月梨花白

曉僊謠

玉妃喚月歸海宮月色澹白涵春空銀河欲轉星靨靨  
碧浪疊山埋早紅宮花有露如新淚小苑叢叢入寒翠  
綺閣空傳唱漏聲網軒未辨凌雲字遙遙珠帳連湘烟  
鶴扇如霜金骨仙碧簫曲盡彩霞動下視九州皆悄然  
秦王女騎紅尾鳳乘空回首晨雞弄霧蓋狂塵億兆家  
世人猶作牽情夢

昆明池水戰詞

汪汪積水光連空重疊細紋交潏紅赤帝龍孫鱗甲怒

臨流一盼生陰風鼉鼓三聲報天子雕旗獸艦凌波起  
雷吼濤驚白若山石鯨眼裂蟠蛟死滇池海浦俱喧逐  
青翰畫鷁相次來箭羽槍纓三百萬蹋翻西海生塵埃  
茂陵仙去菱花老嗉嗉游魚近烟島渺莽殘陽釣艇歸  
綠頭江鴨眠沙草

湖陰詞

并序

王敦舉兵至湖陰明帝微行視其行伍由是樂  
府有湖陰曲而亡其詞因作而附之

祖龍黃鬚珊瑚鞭鐵驄金面青連錢虎髯拔劍欲成夢  
日壓賊營如血鮮海旗風急驚眠起甲重光搖照湖水  
蒼皇追騎塵外歸森索妖星陳前死五陵愁碧春萋萋  
灞川玉馬空中嘶羽書如電入青瑣雪腕如槌催畫鞞  
白蚪天子金鉉鉉高臨帝座回龍章吳波不動楚山晚  
花壓闌干春晝長

春江花月夜詞

玉樹歌闌海雲黑花庭忽作青燕國秦淮有水水無情



還向金陵漾春色楊家二世安九重不御華芝嫌六龍  
百幅錦帆風力滿連天展盡金芙蓉珠翠丁星復明滅  
龍頭劈浪哀笳發千里涵空照水魂萬枝破鼻團香雪  
漏轉霞高滄海西玻璃枕上聞天雞蠻弦代雁曲如語  
一醉昏昏天下迷四方傾動烟塵起猶在濃香夢魂裏  
後主荒宮有曉鷺飛來只隔西江水

生襟屏風歌

玉墀暗接崑崙井井上無人金索冷畫壁陰森九子堂

階前碎月鋪花影  
繡屏銀鴨香  
翳濛天上夢  
歸花繞叢  
宜男漫作後庭草  
不似櫻桃千子紅

感築歌

蠟烟如燾新蟾滿  
門外沙平草牙短  
黑頭丞相九天歸  
夜聽飛瓊吹羽管  
情遠氣調蘭蕙熏  
天香瑞彩含綢緼  
皓然纖指都揭血  
日暎碧霄無片雲  
含商咀徵雙幽咽  
輦轂疎羅共蕭屑  
不盡長員疊翠愁  
柳風吹破澄潭月  
鳴梭浙瀝金絲樂  
恨語殷勤龍頭水  
漢將營前萬里沙

更深一一霜鴻起十二樓前花正繖交枝簇蒂連壁門  
景陽宮女正愁絕莫使此聲催斷魂

照影曲

景陽妝罷瓊窗暝欲照澄明香步嬾橋上衣多抱彩雲  
金鮮不動春塘滿黃印額山輕為塵翠鱗紅稗俱含嚙  
桃花百媚如欲語曾為無雙今兩身

吳苑行

錦雉雙飛梅結子平春遠綠窗中起吳江澹畫水連空

三尺屏風隔千里小苑有門紅扇開天絲舞蝶俱裴回  
綺戶雕楹長若此韶光歲歲如歸來

常林歡歌

宜城酒熟花覆橋沙晴綠鴨鳴咬咬襖桑繞舍麥如尾  
幽軋鳴機雙燕巢馬聲特特荆門道蠻水揚光色如草  
錦薦金鑪夢正長東家哢喔雞鳴早

將侯神歌

楚神鐵馬金鳴珂夜動蛟潭生素波商風刮水報西帝

廟前古樹蟠白蛇吳王赤斧斫雲陳畫堂列壁叢霜刃  
巫娥傳意託悲絲鐸語琅琅理雙鬢湘烟刷翠湘山斜  
東方日出飛神稚青雲自有黑龍子潘妃莫結丁香花

漢皇迎春詞

春草芊芊晴埽煙宮城大錦紅殷鮮海日初融照僊掌  
淮王小隊纓鈴響獵獵東風燄赤旗畫神金甲葱龍網  
鉅公步輦迎句芒複道埽塵鷺彗長豹尾竿前趙飛燕  
柳風吹盡眉間黃碧草含情杏花喜上林鸞囀游絲起

寶馬搖環萬騎歸  
恩光暗入簾櫳裏

蘭塘詞

塘水汪汪鳬唼喋  
憶上江南木蘭楫  
繡領金須蕩倒光  
團團皺綠雞頭葉  
露凝荷卷珠淨員  
紫菱刺短浮根纏  
小姑歸晚紅妝淺  
鏡裏芙蓉照水鮮  
東溝滴滴勞回首  
欲寄一桮瓊液酒  
知道無郎却有情  
長教月照相思柳

春洲曲

韶光染色如蛾翠  
綠濕紅鮮水容媚  
蘇小慵多蘭渚閒

融融浦日鷓鴣寐紫駟蹀躞金銜嘶岸上揚鞭烟草迷  
門外平橋連柳隄歸來晚樹黃鸝啼

湘東宴曲

湘東夜宴金貂人楚女含情嬌翠顙玉管將吹插鈿帶  
錦囊斜拂雙麒麟重城漏斷孤帆去唯恐瓊籤報天曙  
萬戶沈沈碧樹員雲飛雨散知何處欲上香車俱脉脉  
清歌響斷銀屏隔隄外紅塵蠟炬歸樓前澹月連江白

春野行

草淺淺春如翦花壓李孃愁飢蠶欲成繭東城少年氣  
堂堂金丸驚起雙鴛鴦含羞更問衛公子月到枕前春  
夢長

罩魚歌


朝罩罩城東暮罩罩城西兩漿鳴幽幽蓮子相高低持  
罩入深水金鱗大如手魚尾迸員波千珠落湘藕風颺  
颺雨離離菱菱刺灘驚飛水連網眼白如景浙瀝蓬聲  
寒點微楚岸有花花蓋屋金塘柳色前谿曲悠悠香若



去無窮五色澄潭鴨頭綠

蘇小小歌

買蓮莫破券買酒莫解金酒裏春容抱離恨水中蓮子  
懷芳心吳宮女兒膏似東家在錢唐小江曲一自檀郎  
逐便風門前春水年年綠



御定全唐詩錄卷七十八

欽定四庫全書

集部

御定全唐詩錄卷

七十九

詳校官左中允<sub>臣</sub>瑋五珠

主事銜<sub>臣</sub>徐以坤覆勘

總校官原任中允<sub>臣</sub>王燕緒

校對官中書<sub>臣</sub>田尹衡

謄錄監生<sub>臣</sub>俞鳳

欽定四庫全書

御定全唐詩錄卷七十九

溫庭筠

二

近體詩

握柘詞

楊柳紫橋綠玫瑰拂地紅繡衫金鞍裏花髻玉瓏璁宿  
雨香潛潤春流水暗通畫樓初夢斷晴日照湘風

送洛南李主簿

想君秦塞外因見遠山青  
槲葉曉迷路枳花春滿庭  
祿優仍侍膳官散得專經  
余亦還愚谷歸心在翠屏

春日野行

騎馬蹋烟莎青春奈怨何  
蝶翎朝粉盡鴉背夕陽多  
柳豔欺芳帶山愁縈翠蛾  
別情無處說方寸是星河

早秋山居

山近覺寒早草堂霜氣晴  
樹彫窗有日池滿水無聲  
果落見猿過葉乾聞鹿行  
素琴機慮靜空伴夜泉清

送人南遊

送君遊楚國江浦樹蒼然沙淨有波迹岸平多草烟角  
悲臨海郡月到渡淮船唯以一杯酒相思隔楚天

贈鄭處士

飄然隨釣艇雲水是天涯紅葉下荒井碧梧侵古槎醉  
收陶令菊貧賣邵平瓜更有相期處南籬一樹花

江岸即事

水容侵古岸峰影度青蘋廟竹唯聞鳥江帆不見人雀

聲花外暝客思柳邊春別恨轉難盡年年汀草新

中書令裴公輓歌詞

王儉風華首蕭何社稷臣丹陽布衣客蓮渚白頭人銘  
勒燕山暮碑沈漢水春從今虛醉飽無復汚車茵

箭下妖星落風前殺氣回國香荀令去樓月庾公來玉  
璽終無慮金滕竟不開空嗟薦賢路芳草滿燕臺

太子西池

梨花雪壓枝鶯轉柳如絲嬾逐妝成曉春融夢覺遲鬢

輕全作影嚙淺未成眉莫信張公子窗間斷暗期  
花紅蘭紫整愁草雨新晴柳占三春色鷓鴣百鳥聲日  
長嫌輦重風暖覺衣輕薄暮香塵起長楊落照明

偶題

孔雀眠高閣櫻桃拂短檐畫明金冉冉  
語玉纖纖細雨無妨燭輕寒不隔簾  
欲將紅錦段因夢寄江淹

贈越僧岳雲

世機消已盡巾屨亦飄然一室故山月滿  
餅秋澗泉禪



蒼過微雪鄉寺隔寒烟應共白蓮客相期松桂前  
蘭亭舊都講今日意如何有樹關深院無塵到淺莎僧  
居隨處好人事出門多不及新春雁年年鏡水波

商山早行

晨起動征鐸客行悲故鄉雞聲茅店月人迹板橋霜  
葉落山路積花明驛牆因思杜陵夢鳬雁滿回塘

題竹谷神祠

蒼蒼松色晚一徑入荒祠古樹風吹馬虛廊日照旗煙

煤朝奠處風雨夜歸時寂寥湘江客空看蔣帝碑

題陳處士幽居

松軒塵外客高竹自蕭疎雨後苔侵井霜來葉滿渠間  
看鏡湖畫時得越僧書若待前谿月誰人伴釣魚

處士廬岵山居

西谿問樵客遙識主人家古樹老連石急泉清露沙千  
峰隨雨暗一徑入雲斜日暮鳥飛散滿山蕎麥花

初秋寄友人

閒夢正悠悠涼風生竹樓夜琴知欲雨曉簾覺新秋獨  
鳥楚山遠一蟬關樹愁憑將離別恨江水問同遊

宿白蓋峰寺寄僧

山房霜氣晴一宿遂平生閣上見林影月中聞澗聲佛  
燈銷永夜僧磬徹寒更不學何居士焚香為宦情

盧氏池上遇雨贈同游

簾翻涼氣集谿上潤殘棊萍皺風來後荷喧雨到時寂  
寥閒望久飄洒獨歸遲無限松江恨煩君解釣絲

宿一公精舍

夜闌黃葉寺并錫兩俱能松下石橋路雨中山殿燈茶  
爐天姥客綦席剡溪僧還笑長門賦高秋卧茂陵

敷水小桃盛開因作

敷水小橋東娟娟照露叢所嗟非勝地堪恨是春風二  
月艷陽節一枝惆悵紅定知留不住吹落路塵中

題造微禪師院

夜香聞偈後岑寂掩雙扉照竹鐙和雪看松月到衣草

堂疎磬斷江寺故人稀惟憶江南雨春風獨鳥歸

登廬氏臺

勝地當通邑前山有故居臺高秋盡出林斷野無餘白  
露鳴蛩急晴天度雁疎由來放懷地非獨在吾廬

題蕭山廟

故道木陰濃荒祠山影東杉松一庭雨幡蓋滿堂風客  
莫晚沙濕馬嘶春廟空夜深雷電歇龍入古潭中

送淮陰孫令之官

隋隄楊柳烟孤擢正悠然蕭寺通淮戍蕪城枕楚田魚  
鹽橋上市燈火雨中船故老青葢岸先知宓子賢

早春瀝水送友人

青門烟野外渡瀝送行人鴨卧溪沙暖鳩鳴社樹春殘  
波青有石幽草綠無塵楊柳東風裏相看淚滿巾

送僧東遊

師歸舊山去此別已悽然燈影秋江寺蓬聲夜雨船鷗  
飛吳市外麟卧晉陵前若到東林社誰人更問禪

細雨

憑軒望秋雨涼入暑衣清極目鳥頻沒片時雲復輕  
泊萍開更斂山葉動還鳴楚客秋江上蕭蕭故國情

感舊陳情五十韻獻淮南李僕射

嵇紹垂髫日山濤筮仕年琴尊陳座上紉綺拜牀前  
鄰里纔三徙雲霄已九遷感深情懔恍言發淚潺湲憶昔  
龍圖盛方今雀羽全桂枝香可襲楊葉舊頻穿玉籍標  
人瑞金丹化地僊賦成攢筆寫歌出滿城傳既矯排虛

翅將持造物權萬靈思鼓鑄羣品待陶甄視草絲綸出  
持網雨露縣法行黃道內居近翠華邊書迹臨湯鼎吟  
聲接舜絃白麻紅燭夜清漏紫微天雷電隨神筆魚龍  
落彩牋間宵陪雍時清暑在甘泉耿介非持祿優游是  
養賢水清臨百粵風靡化三川委寄崇推轂威儀壓控  
弦梁園提轂騎淮水換戎旃照日青油濕迎風錦帳鮮  
黛娥陳二八珠履列三千舞轉回紅袖歌愁斂翠鈿滿  
堂開照耀分座儼嬋娟油額芙蓉帳香塵玳瑁筵繡旗



隨影合金陳似波旋縷幕深回互朱門暗接連彩蚪蟠  
畫戟花馬立金鞭有客將誰託無媒竊自憐抑揚中散  
曲漂泊孝廉船未展干時策徒拋負郭田轉蓬猶邈爾  
懷橘更潛然投足乖蹊徑冥心向簡編未知魚躍地空  
媿鹿鳴篇稷下期方至漳濱病未痊定非籠外鳥真是  
殺中蟬蕙徑鄰幽澹荆扉興靜便草堂苔點點蔬圃水  
濺濺釣罷谿雲重樵歸澗月圓嬾多成宿疾愁甚似春  
眠木直終難怨膏明只自煎鄭鄉空健羨陳榻未招延

旅食逢春盡羈游為事牽官無毛義檄婚乏阮脩錢冉  
弱營中柳披敷幕下蓮儻能容委質非敢望差肩澀劒  
猶堪淬餘朱或可研從師當鼓篋窮理久忘筌折簡能  
榮痒遺簪莫棄捐韶光如見借寒谷變風烟

洞戶二十二韻

洞戶連珠網方疏隱碧潄燭盤烟墜爐簾壓月通陰粉  
白僊郎署霜清玉女礎醉鄉高窈窕慕陳靜惜惜素手  
琉璃扇玄髻玳瑁簪昔邪看寄迹梔子詠同心樹列千

秋勝樓懸七夕鉞舊詞翻白紵新賦換黃金  
唳雀調蠻鼓驚蟬應寶琴舞疑繁易度歌轉斷難尋  
露委花相妬風歌柳不禁橋彎雙表迴池漲一篙深  
清蹕傳恢圓黃旗幸上林神鷹參翰苑天馬破蹄涔  
武庫方題品文園有好音朱莖殊菌蠢丹桂欲蕭森  
黼帳回瑤席華鐙對錦衾畫圖驚走獸書帖得來禽  
河曙秦樓暎山晴魏闕臨綠囊逢趙后青瑣見王沈  
任達嫌孤憤疎慵倦九箴若為南遁客猶作卧龍吟

過華清宮二十二韻

憶昔開元日承平事勝遊貴妃專寵幸天子富春秋月  
白霓裳殿風乾羯鼓樓闌雞花蔽膝騎馬玉搔頭繡轂  
千門伎金鞍萬戶侯薄雲欺雀扇輕雪犯貂裘過客聞  
韶護居人識冕旒氣和春不覺烟暖霽難收澗浪和瓊  
甃晴陽上彩旂卷衣輕鬢嬾窺鏡澹蛾羞屏掩笑容帳  
簾褰玳瑁鉤重瞳分渭曲纖手指神州御案迷萱草天  
袍妒石榴深巖藏浴鳳鮮隰媚潛蚪不料邯鄲蚩俄成

即墨牛劒鋒揮太皞旗簇拂蚩尤內嬖陪行在孤臣預  
坐籌瑤簪遺翡翠霜仗駐驂駟豔笑雙飛斷香魂一哭  
休早梅悲蜀道高樹隔昭丘朱閣重霄近蒼厓萬古愁  
至今湯殿水鳴咽縣前流

詠寒宵

寒宵何耿耿良讌有餘姿寶靸裊回處熏鑪悵望時曲  
瓊垂翡翠斜月到呆愚委墜金缸燼闌跚玉局碁話窮  
猶注睇歌罷尚持頤曖曖遙相屬氛氲積所思秦娥卷

衣晚胡雁度雲遲上郡歸來夢那知錦字詩

春日

問君何所思迢遞豔陽時門靜人歸晚牆高蝶過遲一  
雙青鎖燕千萬綠楊絲屏上吳山遠樓中朔管悲寶書  
無寄處香轂有來期草色將林彩相添入黛眉

開聖寺

路分谿石夾烟叢十里蕭蕭古樹風出寺馬嘶秋色裏  
向陵鴉亂夕陽中竹間泉落山厨靜堦下僧歸影殿空

猶有南朝舊碑在敢將興廢問漁翁

贈蜀將

十年分散劒關秋萬事皆從錦水流志氣已曾明漢節  
功名猶尚帶吳鉤雕邊認箭寒雲重馬上聽笳塞草愁  
今日逢君倍惆悵灌嬰韓信盡封侯

寄清涼寺僧

石路無塵竹徑開昔年曾伴戴顓來窗間半偈聞鐘後  
松下殘碁送客回檐向玉峰籠夜雪砌因流水長秋苔

白蓮會裏如相問說與遊人是姓雷

重遊東峯宗密禪師精廬

百尺青厓三尺墳微言已絕杳難聞戴顓今日稱居士  
支遁他年識領軍暫對杉松如結社偶同麋鹿自成羣  
故山弟子空回首蔥嶺還應見宗雲

題李處士幽居

水玉簪頭戴角巾瑤琴寂歷拂輕塵濃陰似帳紅薇晚  
細雨如煙碧草新隔竹見籠疑有雀卷簾看畫更無人



南窗自有忘機友，谷口空稱鄭子真。

春日偶作

西園一曲豔陽歌，擾擾車塵負薜蘿。  
自欲放懷猶未得，不知經世竟如何。  
夜間猛雨判花盡，寒戀重衾覺夢多。  
釣渚別來應更好，春風還為起微波。

和友人悼亡

玉貌潘郎淚滿衣，畫羅輕鬢雨霏微。  
紅蘭委露愁難盡，白馬朝天望不歸。  
寶鏡塵昏鸞影在，鈿箏弦斷雁行稀。

春風幾許傷情事碧草侵階粉蝶飛

池塘七夕

月出西南露氣秋綺寮河漢在鍼樓楊家繡作鴛鴦幔  
張氏金為翡翠鉤銀燭有光妨宿燕畫屏無睡待牽牛  
萬家碁杵三篙水一夕橫塘似舊游

偶遊

曲巷斜臨一水間小門終日不開關紅珠斗帳櫻桃熟  
金尾屏風孔雀閒雲髻幾迷芳草蝶額黃無限夕陽山

與君便是鴛鴦侶休向人間覓往還

贈知音

翠羽花冠碧樹雞未明先向短牆啼窗間謝女青蛾斂  
門外蕭郎白馬嘶殘曙微星當戶沒澹烟斜月照樓低  
上陽宮裏鐘初動不語垂鞭過柳隄

過陳琳墓

曾於青史見遺文今日飄蓬過此墳詞客有靈應識我  
霸才無主始憐君石麟埋沒藏春草銅雀荒涼對暮雲

莫怪臨風倍惆悵欲將書劒學從軍

西江上送漁父

却逐嚴光向若邪釣綸菱擢寄年華  
三秋梅雨愁楓葉一夜篷舟宿葦花  
不見水雲應有夢偶隨烟鳥便成家  
白蘋風起樓船暮江燕雙雙五兩斜

經李徵君故居

露濃烟重草萋萋樹暎闌干柳拂隄  
一院落花無客醉五更殘月有鶯啼  
芳筵想像情難盡故榭荒涼路已迷

風景宛然人自改却經門巷馬頻嘶

懷真珠亭

珠箔金鉤對彩橋昔年於此見嬌嬈  
香燈悵望飛瓊鬢涼月殷勤碧玉簫  
屏倚故窗山六扇柳垂寒砌露千條  
壞牆經雨蒼苔徧拾得當時舊翠翹

經五丈原

鐵馬雲雕共絕塵柳陰高壓漢宮春  
天清殺氣屯關右夜半妖星照渭濱  
下國卧龍空寤主中原得鹿不由人

象牀寶帳無言語從此譙周是老臣

和王秀才傷歌姬

月缺花殘莫愴然花須終發月須圓更能何事銷芳念  
亦有穠華委逝川一曲豔歌留宛轉九原春草妒嬋娟  
王孫莫學多情客自古多情損少年

送盧處士游吳越

羨君東去見殘梅唯有王孫獨未回吳苑夕陽明古堞  
越宮春草上高臺波生野水雁初下風滿驛樓潮欲來

試逐漁舟看雪浪幾多江燕荇花開

蘇武廟

蘇武魂銷漢使前古祠高樹兩茫然雲邊雁斷胡天月  
隴上羊歸塞草烟回日樓臺非甲帳去時冠劍是丁年  
茂陵不見封侯印空向秋波哭逝川

途中偶作

石路荒塘接野蒿西風吹馬利如刀小橋連驛楊柳晚  
廢寺入門禾黍高雞犬夕陽喧縣市鳬鷺秋水曝城壕

故山有夢不歸去官樹陌塵何太勞

盤石寺留別成公

櫟葉蕭蕭帶葦風寺前歸客別支公  
三秋岸雪花初白一夜林霜葉盡紅  
山疊楚天雲壓塞浪遙吳苑水連空  
悠然旅榜頻回首無復松窗半偈同

牡丹

水漾晴紅壓疊波曉來金粉覆庭莎  
裁成艷思偏應巧分得春光最數多  
欲綻似含雙顰笑正繁疑有一聲歌



華堂客散簾垂地想凭闌干歛翠蛾

谿上行

綠塘漾漾烟濛濛張翰此來情不窮  
雪羽薺薺立倒影金鱗撥刺跳晴空  
風翻荷葉一向白雨濕蓼花千穗紅  
心羨夕陽波上客片時歸夢釣船中

題望苑驛

弱柳千條杏一枝半含春雨半垂絲  
景陽寒井人難到長樂晨鐘曉自知  
花影幾年通博望樹名何代號相思

至今十二樓前月不向西陵照盛姬

宿杜城亡友李翔處士故墅

柳不成絲草帶煙海槎東去鶴歸天  
愁腸斷處春何限  
病眼開時月正圓  
花若有情還悵望  
水應無事莫潺湲  
終知此恨難消遣  
辜負南華第二篇

題柳

楊柳千條拂面絲  
綠烟金穗不勝吹  
香隨靜婉歌塵起  
影伴嬌嬈舞袖垂  
羌管一聲何處曲  
流鶯百轉最高枝

千門九陌花如雪飛過宮牆兩不知

贈少年

江海相逢客恨多秋風葉下洞庭波酒酣夜別淮陰市  
月照高樓一曲歌

蔡中郎墳

古墳零落野花春聞說中郎有後身今日愛才非昔日  
莫拋心力作詞人

長安春晚

曲江春半日遲遲正是王孫悵望時  
杏花落盡不歸去  
江上東風吹柳絲

彈箏人

天寶年中事玉皇曾將新曲教寧王  
鈿蟬金鳳皆零落  
一曲伊州淚萬行

瑤瑟怨

冰簟銀牀夢不成碧天如水夜雲輕  
雁聲還過瀟湘去  
十二樓中月自明

渭上題

呂公榮達子陵歸萬古烟波繞釣磯橋上一通名利迹  
至今江鳥背人飛

目極雲霄思浩然風帆一片水連天輕橈便是東歸路  
不肯忘機作釣船

烟水何曾息世機暫時相向亦依依所嗟白首磻谿叟  
一下漁舟更不歸

經故翰林袁學士居

劍逐驚波玉委塵  
謝安門下更何人  
西州城外花千樹  
盡是羊曇醉後春

題城南杜邠公林亭

卓氏壚前金線柳  
隋家隄畔錦帆風  
貪為兩地分霖雨  
不見池蓮照水紅

過分水嶺

谿水無情似有情  
入山三日得同行  
嶺頭便是分頭處  
惜別潺湲一夜聲

鄆杜郊居

槿籬芳援近樵家  
隴麥青青一徑斜  
寂寞遊人寒食後  
夜來風雨送梨花

楊柳枝

宜春苑外最長條  
閒裊春風伴舞腰  
正是玉人腸斷處  
一渠春水赤闌橋

南門牆東御路旁  
預知春色柳絲黃  
杏花未肯無情思  
何事行人最斷腸

蘇小門前柳萬條  
金線拂平橋  
黃鸝不語東風起  
深閉朱門伴細腰

金縷毵毵碧瓦溝  
六宮眉黛惹春愁  
曉來更帶龍池雨  
半拂闌干半入樓

館娃宮外鄴城西  
遠映征帆近拂隄  
繫得王孫歸思切  
不關春草綠萋萋

兩兩黃鸝色似金  
長枝啼露動芳音  
春來幸自長如線  
可惜牽纏蕩子心



御柳如絲映九重鳳凰窗柱繡芙蓉景陽樓畔千條露  
一面新妝待曉鐘

織錦機邊罵語頻停梭垂淚憶征人塞門三日猶蕭索  
縱有垂楊未覺春

觀暴

閒對楸枰傾一壺黃華坪上幾成廬他時謁帝銅池水  
便賭宣城太守無

御定全唐詩錄卷七十九